



EBBES FERR UMME

Zwää Flomerschummer dreffen sich am Zwiwwelbrunne:

Fritz: " Serwes Hannes, alder Schbrichbubbes, wie geht derrs dann so? "

Hannes: " Ooch Fritz, garnit so doll. "

Fritz: " Ei, wieso dann? "

Hannes: " S`werd hald alles schlechder. Nirgends griggschd mäh was gschenkt. "

Fritz: " Dess schdimmd awwer nit. Do gibts was, dess koschd nix, dess griggschd zum Nulltarif unn brauchschd garnix druffzubezahle. "

Hannes: " Aach, äwe habb ischs. Du mähnschd de Schielmann! "

Fritz: " Nää, wass isch jetzt mäh, dodeför brauchschd noch niddemool en Grankeschoi. "

Hannes: " Do falld merr jedzd awwer iwverhaupt nix oi. "

Fritz: " Ei`s "Flomerschummer Gebabbel", du Dabbes! "


Walter Rupp

(dasses ebbes ferr umme gibbt, is jo wirgliche e Raridät, awwer dess iss bloß möglich, weil die Fa. Dreher uns dess Hefdel koschdelos druggt unn die AGF die Koschde ferr die Verdählung iwwernimmt !!!)

DIE NARREKAPP

vumm *Udo Böhm*

Ei, was isse doch so schlapp,
bis zum 10. 11., die Narrekapp´.
Liegt im Schrank in ihrer Hüll´,
newer annre Hüt´ unn Tüll.
Ruhete sich aus e langi Zeit,
doch dann kummt de 11. 11., ach ehr Leit´!



denn de Narr will ausem Haus.
Am 11. 11. - jedes Johr,
werd' die Kapp' uffgsetzt, des is doch kloor!
Jedem Narr gfallt sei Kapp',
jetzt werd gfeiert, unn net so knapp'!

Uffem Kopp sieht se jetzt lustisch aus,
unn es zieht uns jetzt enaus
in die TuS-Hall', die schääne, neie -
all' duhn se sich hier freie.
Jedem Narr gfallt sei Kapp',
jetzt werd gfeiert, unn net so knapp'!

Weiß, rot, gelb, grün sind ihre Farwe,
sieht uffem Kopp aus wie en Garwe,
oder besser wie de Kamm vum Gockel,
schääner wie de Hut vum Zwocckel!
Jedem Narr gfallt sei Kapp',
jetzt werd gfeiert, unn net so knapp'!

Vorne e luschtischi Kuggel bambelt,
unn sie wackelt, wann mer strambelt.
Eindruck macht se uff die Fraue,
die uff uns Männer, wie Hinkle uff de
Gockel schau.
Jedem Narr gfallt sei Kapp',
jetzt werd gfeiert, unn net so knapp'!

Die Narrekapp' verschönt uns all',
an de Prunksitzung oder uffem Ordensball.
Macht Kläne groß, ja des is woor,
verdeckt die Glatz' ganz ohne Hoor.
Jedem Narr gfallt sei Kapp',
jetzt werd gfeiert, unn net so knapp'!

So zieht se fröhlich durch die Zeit,
die Narrekapp iss schää, ehr Leit'.
Steht ääner in de Bitt' mit dere Kapp',
Do nimmt mer ihm so manches ab!
Jedem Narr gfallt sei Kapp',
jetzt werd gfeiert, unn net so knapp'!

An Aschermittwoch denkt di Kapp' zurück,
an schöne Tage voller Fasnachtsglück!
Sie schleicht zurück widder in de Schrank;
die nächste Fasnacht kummt widder, Gottseidank!
Doch erscht werd gfeiert, net so knapp,
denn: Jedem Narr gfallt sei Kapp'!



Die Flomerschmer Kerwesau



vumm *Anton Pollich*

Seit lange Johre schunn iss enn Hejepunkt vunn de Flomerschmer Kerwe die Verlosung vunn dere beriehmte ES-PE-DE-Sau. Am Afang isse noch lewendisch beim Kerweumzug mitfahre. Meischdens hottse gschloofe odder mied die Umzugsgugger ageblinzeld. Weil awwer de Dierschutzveroin Angschd ghatt hott, dass die Sau so viel Kerwewoi schlabbre deet, fahrt heit bloos noch e leblosi Figur mit.

Beim Umzug unn iwwer die ganz Kerwe verkaafen die Freunde vunn die Sau die Lose ferr die groß' Sauverlosung. Unn wär kä Los hott, der kann a net die Sau gewinne.


Am Dienschdaagowend isses dann endlich soweit. Schunn middaags kummen die erschde Leid ins Zeld, um jo en guude Blatz zu grigge. Bis owens iss dann des Kerwezeld groddevoll. Jeder hott uffem Disch foi seiwerlich soi Lose bereidligge - sicherheidshalwer a noch en Zeddel, wu die Nummre all nodierd sinn. Die Schbannung schdeit, wann e Flomerschmer Kind die Gewinnzahl aus de Drummel ziehd und de Baumanns Fritz unn de Schambachs Theo die Nummer vorlesen. Die Zwää machen dess zum Schieße. Dess geht ugfähr so:

De Fritz: "*Die ledschd Zahl iss die SIWWE*" - de Theo: *Hott die iwwerhaupt jemand? - ja? - guud, Fritz mach weider*" - de Fritz: "*Die vorledschd Zahl iss die DREI*" - de Theo: "*Iss jemand do wu die zwää Zahle hott? - ja? - do mache mer weider*" - de Fritz: "*Die dridd Zahl vunn hinne unn gleichzeitich die zwädd Zahl vunn vorne iss die NULL*" - de Theo: "*Iss jemand im Zeld, wu alle drei Zahl hott? - ja, zwää sogar - jedzd werrds schbannend. Fritz mach weider!*" - de Fritz: "*Die ledschd Zahl -Ehr glaabts net - dess iss die vierd Zahl vunn hinne - ehr Leid, isch lach mich kabudd, dess iss jo a die erschd Zahl vunn vorne - 's iss die ÄÄNS*". - Muggsmeiselschdill im Zeld - uff ämool enn Uffschrei - die Sau hott en neie Besitzer! Der Gewinner fräät sich unn ahnt noch garnit, was alles uffen zu kummd. Die annere Leid trinken enddeischd ehr Glas leer, beschdellen en neie Schobbe unn hoffen uffs Negschdjohr.

P.S. Noinzehhunderdsiwwenunoinzisch hotts lang gedauerd, bis die Sau gewunne war. Dess hott awwer nit an die Klää vunns Engelhardts geleje, nää, de Fritz unn de Theo waren schuld! De Fritz weiler net do war - unn de Theo weiler die Zahle vunn vorne nooch hinne gelese hott. Do gschiedsem ganz rechd, dass er am Schluss so enn druggene Hals ghatt hott.



De Egon unn de Kall dreffen sich nooch langer Zeid zufällisch mool widder bei's Brenners im "Birgerschdibbel" beim Lewwergneedelesse. Seschd de Kall: "*Du käänschd misch ruisch emool frooge, wie merrs geht!*" - De Egon: "*Ja wie geht derrs dann, Kall?*" - De Kall: "*Ach, froog net!*"



De neie Woi

vumm *Erwin Gerhard* aus Frankedaal

Ääns lossen Eich mool glei gsaad soi, so neie Woi schmeeggt werglich foi. Jed Johr, so um die Lesezeit, isses doher aach soweit: Merr muss de NEIE mool versuche, zu Keschde unn zu Zwiwwelkuche. Unn weil er grad so nunnergeht, werd ähns nom anner abgedreht. Doch gibbt's kä Frääd ohne e Klage, dess Zeig schlecht glei ehm uff de Maage. Dezu kummt noch, unn sell iss grobb, griggschd ah noch en dolle Kopp. Enn Brummschädel, dess is gewiss, denn griggschd beschdimmt, unn ah die Kurv nimmi. Doch obwohl merr all dess wääß, iss merr jed Johr widder hääß; uff die siffisch Rewebrieh - also langt merr widder hie. Äh - zwää Gläselcher zu schligge - wärschd dodevunn die Gränk nit grigge. Bischd awwer uff de Gschmack dann kumme, wärren noch e paar genumme. Unn uff ämool mergt merr schdutzend, ei - jetzt hawwisch glei e Dutzend. Egal, was solls, 'sis wunderbar, bletzlich gfallt ähm jede Fraa, glei druff werd dann noch ähner gsunge; der Owend heit, der iss gelunge. Dann gehschde awwer häme glei, 'sis immerhie nachts halwer drei, unn schloofschd im Bedd dann seelisch oi - gelobt seischd du, moin neier Woi.

Wann dann am sechs de Wegger rasselt, iss schunn de ganze Daag vermasset. Schdeigschd ausem Bedd, oh armer Dropp, mähschd griggschd en Hammer uff die Kopp. Dann schwörschd jed Johr die selwe Leier:

"Nesgchd Johr drinkschd nimmi so viel NEIER".



Widder was dezu gelernt !

Vor kurzem hott uns en Freund verzeht, dass er beim Zahdogder enn Termin ferr e große Operazion ghatt hott. Er hott sich seelisch-moralisch druff vorbereitet. Wie er dann drakumme iss, hodder sich brav hieghoggt unns Maul uffgschberred. Awwer do hodd sich rausgschdelld, dass es e Verwexlung mim Dadum war, unn er soll heit bloss en Teschd gemacht grigge. Dodezu hott er sich mit soine

naggische Fieß uff zwää Metallblatte schdelle misse. Dann hännsem Schdrohm durchgejagt, unn nooch 10 Minudde waren die Blatte ganz unnerschiedlich verfärbt (unsern Freund warscheinlich ah). Dodra hodd der Dogder dann abgelese, dass er am rechde Aag emool verledzt war unn dass er ah emol ganz gewaldisch mim Hinnerkopp uffgebatschd iss. Unn dess hott dadsächlich gschdimmd, obwohl dess schunn zisch-Johre herwar. Gell, 'sis kaum zu glaawe, was heit so alles meeglich iss. - Unn was kennemer aus dem Erlebnis lerne:

Wammer zum Zahnarzd geht, muss merr sich vorher die Fieß wesche!

Walter Rupp



Dr. Sigrid Bingenheimer

Pfälzisches Wörterbuch

Arbeitsstelle der Akademie der Wissenschaften
und der Literatur • Mainz

Postanschrift:

Benzinoring 6

D-67657 Kaiserslautern, 7. Mai. 97

Tel./Fax: 0631 92896

Herrn

Walter Rupp

Freinsheimer Straße 107

67227 Flomersheim

Liewer Herr Rupp,

fer die Sendung mit dene Hefdelcher *Flomerschummer Gebabbel* wolle mer uns schää bedanke! Arich gefreit hot uns die Erwähnung uff de erschde Seit. Ja, mer sammele Eier Bättscher unn finnen's gut, dass Ehr Eier Zeit draagewwen unn so was Scheenes machen. Weirerhee viel Spass unn Erfolg!

Moi Gebabbel is sicher net richdisch Flomerschummerisch, weil das jo kanner noomache kann, wanner's net vun Kindheit her gelernt hot. (Isch selbscht sein vun Rhoihesse). Awwer isch prowewer's halt so gut wie isch's kann.

Damit isch aach emool ebbes fer Eich mitschicke kann, habb isch in unserm Archiv gesteewert unn aach werklich ebbes g'funne. Dann die Beschäfdichung mit de Mundart es jo net nei. Do hot zum Beispiel em Johr 1925 de Hauptlehrer EBRECHT vun Flomerschum, soin Vorname war FRIEDRICH, en Fracheboche fer unser Werderbuch ausg'fillt un uns g'schickt. Vun dem hummer dann gelernt, dass en Flomerschum de Feldsalat *Riddscher* haaßt und die Stachelbeere *Grussele*. Un die *Speckmaus* es koo Diersche, wo en ehr Loch huscht unn wann se Pesch hot, vun de Katz g'fang werd, naa, e Flomerschumer *Speckmaus* kann fliee'e un haaßt sunscht *Flerrermaus*. Un was bei annere die Hausgrill orrer e Heimche is, is in Flomerschum e *Kricksel*.

So kennt isch Eich noch veel Werder schreiw, vun dene Ehr gar net wissen, dass mer se wissen un wo Eier Kinner vielleicht schun gar net meh kennen. Awwer die stehn jo all em Pälzische Werderbuch. Un mer sinn ganz stolz unn glicklich, dass es grad dass Johr ferdich werd. Em Herbscht gibt's dann e groß Fescht desweje en Laudere en de Fruchthall unn Ehr werrn nadierlich aa noch dezu englad.

Alla, Ehr Leid, machen weirer soo. Mer winschen Eich veel Glick dezu.

Eies S. Bingenheimer

Jezt kummen mer widder uff die Seit, wu unser Rädselexperde schunn wochelang druff waaden, um schließlich dann doch nooch korzer Zeit zu resigniere unn des Hefdel ins Egg zu feire.

E paar Leid hänn gsaat, des ledschde Rädsel wer viel zu schwer gewässd. Un wie mer vunn "paarweise auftretende Zuhälter" uff "Schuhbennel" kumme sollt, des wer schunn verrickd, weil richdische Loddl jo normalerweis sowieso blos Laggschuh zum noischlubbe ahedden, un die deden garned gebunne werre... Na ja, - egal, desmol hämmers glawisch e bissel leichder gemachd, un des Leesungsword bassd a zu de jezich Zeit.



Ufflösung aussem Gebabbelhefd 4:

- 1= Bumbeschwengel / 2= Wurzelberschd / 3= Broggelbohne
4= Schuhbennel / 5= Knoddelkärchel / 6= Raddegiggel
7= Trauwehähgel / 8= Butzwollkopp / 9= Schdaablumbe
10= Schbeicherdrebb / 11= Drummelschdegge

Lösungsword: Glockenturm


Die Gewinner vumm ledschdemol



- 6 Fl. Woi - Joachim Nagel
4 Fl. Woi - Bernhard Münch
2 Fl. Woi - Pia+Jürgen Bracht



PÄLZER GRAIZWORDRÄDSEL



Die Frooge:

1= Unterkunft für Vogelstimmen / 2= er reißt beim Frühstück nicht vom Hocker / 3= mit den Zehen spielender Fußballer / 4= unruhiges Spielzeug / 5= Gewürz / 6= verklebte Optik / 7=trennungseinleitendes Getränk / 8= rollender Plattmacher / 9= überdimensionale Fußbekleidung / 10= Sammler von Zigarettenresten / 11= Schimpfwort für unredlichen, asozialen Zeitgenossen / 12= schwammelnde Süßigkeit / 13= tolpatschiger Mensch / 14= Groschengrab auf der Kerwe / 15= faltiges Instrument

Des *Lesungsword*, in de digg umrahmde Käschdelscher, vunn links owwe nooch schräg rechds unne bis in die mitte un dann widder links weider bis gans nunner gelese, kender uff e Fäzzel Babier schreibe un beis Rubbe in de *Fränsemer Schdroos 107*, dord, wu die Elwetridsch wie in Diesejäger iwterm Hofdoor hängt, bis zum *31. Dezember* in de Briefkaschde schmeise.

Pälzer Kisch im Zillerdaal



vumm *Rolf Müller*

Noochdäm merr unsern Urlaub schunn X-mool im Zillerdaal verbochd hänn, hawwe merr uns iwwerleggd, was merr unsre Vermieder außer Pälzer Woi unn Frankedahler Bier noch mitbringe kennden. Nooch korzem Iwwerlegge simmer druff kumme, dasses "Flomerschummer Kochbuch" obdimal weer.

War dess e Frääd ferr die Leid.

Glei noochem Gscherrschbiele hott sich die Jungbeirin hieghoggt und eifrisch in unserm Midbringsel geblädderd. Dodebei hot se feschedgschdelld, dass jo so viel Pälzer Schbezialidäde noch garnit kennt. Unn weil's jo Weißgraud, Grumbbeere unn Schwoineflääsch genug gibt, hottse beschlosse, dass am negschde Daag zum Middagesse dess "exoodische" Grumbbeergraud ausbrobierd werred. Glei hott se moi Fraa gfroogt, obsre dodebei e bissel helfe deet. Dess war en Voldreffter, denn dess war jo mool widder so rischdisch was ferr moi Christl.

Am negschde Daag, glei noom Frieschdigg, hänn se agfange: Graud budze, Grumbbeere scheele, Flääsch gläschnibble. In de greeschde Hawwe wu im Haus war, iss alles noigschmisse worre, die Gewerrze dezu unn ball hotts afange zu koche. Am Elfe rumm iss en Dufd durchs Haus gezooge, dass ehm 's Wasser im Maul zammegeloffe iss. Punkt zwölfe war "Essefasse".

Do hännse mool gschubberd, wasses do ferr e neies Gerichtd aus Flomerschumm in de Palz gibt. Guud rieche duuds jo. Jeder hott sich glei emool en Deller vollgelade. Dann isses losgange. Wie dess awwer hald so iss hänn sich all erschdmool die Gusch verbrennd. Unn weilsen so guud gschmeggt hott, hänn se solang Noochschlag gholt, bisse nimmi schnaufe gekannt hänn.


De Reschd vunn dem "Feschdmahl" hot de Bauer Franz am negschde Daag mid uff die Alm genumme.

Iwwrishens: Zum Noochdich hämmer unsre Gaschdgewwer 's "Flomerschummer Gebabbel" serviert. Ehr kemmers glaawe - do dro gnawwern se heit noch!



Was die Flomerschummer in ehre
Urlaubsposchd so alles schreiwen

Meer dehten Eich jo gäärn schreiwe ob dess Wedder guud iss odder nit, ob merr e dolli Wohnung henn odder nit, ob die Fisch beißen odder nit, ob de Schdrand schäh iss odder nit, obs Esse guud iss odder nit unn noch viel mäh. Schaad, dass uff dääre Kaad kenn Blatz mäh iss.R. + L.



Moi Mudder hott mich emool fordgschiggd, ferr Worschdsubb unn e bissel frische Worschd zu hole. 'S Diddemers hänn namlich gschlachd ghatt. Do binn isch glei mid de Milschkann losgedabbd.

Drinn, in de Kisch, hab isch als Erschdes glei e dobbeldes Schdigg Brood mit Lewwerworschd gschmeerd griggd, weil isch die jo so gäärn gesse hab. Wie isch dann ferrdisch, die Worschd oigepaggd unn die Worschdsupp abgfilld war, hott die ald Fraa Diddemer zu meer gsaad: "Do wiggel isch noch ferr dich e gläänes Kinnerlewwerwärschdel oi".

Wie isch dehääm war, wolld isch moi Wärschdel mool glei schnawwelliere. Do hott moi Mudder gsaad: "Jezerd nimmi - uff die Nachd verdraagschd dess Lewwerwärschdel nidd. Wann du noochher ins Bedd geschd, legg isch deer doi Wärschdel uff de Schduhl, unn moje frieh schmeer isch derrs uffs Brood ferr in die Schuul". - "Ach Mamme", hab isch do gsaad unn gegroind dabei, "isch esses liewer jedzd - nit dass sich moi Schutzengelsche heid Nachd uff dess Lewwerwärschdel sedzd!".

Christl Müller

Zwää wohre Gschichdelcher - verzeht vunn de *Helge Rupp*

Kinschdlerbech

Friajer hänn in unsre Schdrooß zwää Baure gewohnt. Bei denne hämmer alle Johr abwechselnd unser Windergrumbeere zum Oikellre gholt. De äh hott ganz am End gewohnt, de anner grad bei uns gegeniwwer. Amme schääne Daag war der vunn ganz unne widder dra. Damit unsern Nochber dess nit ubedingt sieht, iss en Gsell aus unserm Gschäfd schdadd mim Saggkarre exdra mim Audo nunnergfahre, hott die Grumbeere oigelade unn iss riggwärds widder bis vor unser Hausdeer gfahre. Do hodder de Kofferraum uffgemacht unn schunn sinn alle Grumbeere rausgekullerd - direkt vor die Fieß vumm Nochbersbauer.

Pälzer Schbroochverwirrung

Do iss emool ähner middm Raad durch de Wald gfahre. Uff ämool hott's gegracht und zwische Rääf unn Schutzblech hott sich en Tannegoggel noigeworschdeld. Dess Schutzblech war ganz vergrumbeld unn die Halderung abgebroche. Do hodder sich halt e neies kaafe misse. In demm Fahrradgschäfd hodder dann dere Verkaiferin verzehd, dass sich do en Goggel drinn verworschdeld ghatt hott. "Ach du liewi Zeit" - hott se do gerufe, "der arme Goggel - hodders iwwerlebt?".

Jedzd kummen zwää Tatsacheberichde vunn de *Helga Wirth*:

Saure Verriehrde



Beim ledschde "Gebabbeldreff" hämmer ah mool widder iwwers Esse geredd. Die Chrisdel hott vunn "Saure Verriehrde" gwschärmd; sie hott gemähnt, bisse als middem Koche ferdisch iss, wärsch meischdens vumm Versuche schunn satt.

De Walder unn isch hänn glei gsaad, dass merr dess ah mool widder gern esse deeden. Dodebei hott jo unserm Elwedritsche-Dreiwier ganz vergesse ghatt, dass dess

Rezebd dodezu im Gebabbelhefd Nummer zwää drinn schdehd.

Nochdem mer dann allminanner do waren, iss beschlosse worre: Die Chrisdel macht Saure Verriehrde, unn mer laden uns all dezu oi. Mer waren uns norre iwwer de Termin net ähnisch. De Elwedritschus Tonikus (Töpfer-Elwedritsche) hott gemähnd, dass merr des kulinarische Ereignis middem Erschoine vumm vierde Gebabbelhefd feire solden. Dess war dann e beschlosseni Sach. Nadierlich warn außer unsre iebliche "Gebabbel-Schreiwier" mit Ahang noch e bissel Brominenz oigelade, u. a. z. B. de Owwer-Elwedritschus-Borthus mit Fraa, vunn unsere Hausdruggerei de Herr Dreher unn soi Fraa, unser rasendie Reborrderin, die Ursel Lutz mid ehre Mann unn die Fraa Schwertner vumm Frankedahler Wocheblatt.

Endlich war er dann do - de 21de April !

Do hämmer uns in de Zwiwwelschdubb gedroffe, um dess keschdlische Mahl zu genieße. Die Chrisdel hott die Grumbeere, die Grachelscher unn die annere Zutade gschdift unn do draus e paar schääne Häwwelcher Saure Verriehrde gezauberd. Die Kerwesau vumm Anton war in Form vunn Lewwer- unn Grieweworschd verdrehde. Em Walder soi Elwedritschus Mediteranus (Helge) hott selwergebaggenes Brood midgebrocht. Mid're glääne Verschbeedung iss uns dann die Schbezialidät serwierd worre. Beim Esse hawwisch dann mol die Aage zugemachd unn gschwärmd: " So hotts friejer immer geroche, wann moin Vadder die Saure Verriehrde gemachd hott !".

Allminanner hännse gsaad: " Dess schmeggt äfach Glasse - Subber - Brima !".

Als Noochdisch, ehr Leid, so ebbes hett ehr noch net gsehe unn gesse, e Schissel voll Schogglade-Budding aus 5 Lidder Milch, hergschdelld vunn unserm Ton-Inscheneer noch soim Rezebd vumm Gebabbelhefd Nummer vier.

Mer warn allminanner vunn dem Owend so begeischderd, dass merr erschd am halwer hämgange sinn; s'kann awwer ah schunn dreiverddel gewesst soi.

Ach war dess schää, wanns als nerre mool efders so en 21de April gewwe deed.

Erschd denke - dann rassiere !

Enn guadaussehende Mann wolld sich mojens rassiere. Weil die Familie grad am Umziehe war, hodder in de ganze Wohnung känn ähnzische Schbiggel mä gfunne. Verzweifeld iss der Mann im ganze Haus rummgerent, awwer nix zu mache, 'swar kanner do. Dann die reddend Idee, vorm Haus schdehd jo em Walder soi Audo; also nix wie noi unn an dem Mini-Schbiggel umschdändlich rassierd. Hett der Schloofwandler e bissel besser gedenkt unn geguggt, do wärem soi Wohnmobil oi- unn uffgalle. Do sinn nämlich schääne große Schbiggel drinn!

Flomerschumm bliggt widder durch

Wass mer im ledschde Jahr ganz arg uffgfalle iss, war die mischderiös Rausrobb-Sucht, die in efferdliche unn ah viel briwade Grundschtigge um sich gegriffte hott. Irgend en Virus muß die Leit ogfalle hawwe, weil se iwweeraal Efeu, Hegge, Bääm unn Schdreicher abgeholtz hänn. An alle Egge sinn die alde Maure widder zum Vorschoi kumme - und des grad jedzd, wu mer doch froh iss, daß die "groß´ Mauer" verschwunde iss. Do wu die ganz Zeid Äschd unn Blädder die Wänd schaddiert hänn, wu uzehlsche klääne Diercher ehr Wohnung ghatt, wu die Veggel ehr Eier ausgebriecht unn sich vor die Katze verschdeggelt hänn, do schdrahlen jetzt widder schneeweiße Wänd. An sich wer des jo jedzd de beschde Blatz fer e paar uffridelnde Parole druff zu schreiwe - vielleicht "Aktion gegen die Abholzung der Regenwälder" odder "Jedes Blatt ersetzt ´nen KAT" odder so was ähnliches. Awwer dess werd wohl niemand mache.

Do wu die Hegge gschdanne henn, werdd meischdens nutzloses Gras ausgseht. Kuldiwierde Leit nennen dess "Rasen". Der muss dann mit viel Energieuffwand gemeht, gedingt unn gewässerd werre, uhne dass er uns dodevor e bissel Sauerschdoff schbendierd. Die arme Veggelscher wissen jo ball nimmi wu se sich hihogge sollen. Im Winder werren se agfidderd, weil se jo so possierlich aussehen - unn im Summer griggen se die Nischdblätz geglaut. Wuher dess wohl kummt, dess mit dere Sucht - do kammer bloss schbeguliere: Vielleicht dass uns de russisch Gehoimdinschd wege demm "Glasnoschd" hoimlich Rausrobb-Wire in die Senftube schbridzd - odder die außerirdische UFO´s schmeißen ehr Kahlschlag-Bazille uff uns runner, damid se uns besser sehe können - odder will hald jeder bloß zeige, dass er nix zu verberge hott.

Egal wie - de Heinz Becker deht do beschdimmt sage:
"Jo geh´ fort".

Ferr Homerschummer Kinner unn dies emool waren unn de Marie-Luise Hartmann

Vor langer Zeid, eigentlich wars gar kü Zeid,
weils domools noch kü Gummibäärcher gewwe
hott. Die waren all noch im Himmel. Awwer
die Kinner hänn sich zu helfe gewist. `S hott e
Rezept ferr Gudel gewwe, dess sich in de Schuul
schnell remmschbroche hott; im Laade hott
merr jo domols känns giecht:

Budder mit Zuger in de Pann uffem Hääd
verlaafe losse unn riere. Ganz Raffinierde
hänn noch in Schuss Essisch dezu. Wann alles
schäh hellbraun war, isses schlimmschde kumme:

`S waade bisses hard worre iss. Dann
druffgeglöbt bis die Pann leer war, in e Schdigg
Babier gewiggeld unn ab uff die Gass.

Die Zahdogder hänn heit noch ehr Frääd dra!



Dreher-Druck- Mikrofilm-Consult GmbH

Hannongstraße 27
67227 Frankenthal / Pfalz
Telefon (06233) 27242
Fax (06233) 27552

Die AGF wünscht alle Fääns vumm Gebammel-Hefdel schänne Feierdaage !!!
Gschdaldung: Walter Rupp - Rädsel: Reinhold Wirth
November neunzehhunnerdsiwweneneunzisch